

# JUAN

## ꝥuarí jóaripũ

### Cãmerí maĩdutíre

<sup>1</sup>Yũũ mũũ Cõãmacũ beserigore, teero biiri mũũ põnarẽ añudutia. Yũũ bũtoá dutirá<sup>a</sup> menamacũ múãrẽ niirõrã maĩ. Yũũ dícu múãrẽ maĩgũ tiiría; niipetira diamacũ maquẽrẽ masírã múãrẽ maĩ-íya. <sup>2</sup>Diamacũ maquẽrẽ cwoa marí. Tee marímena niirucujãadacu.

<sup>3</sup>Cõãmacũ marí Pacũ, teero biiri cũũ macũ Jesucristo marí Õpũ múãrẽ añurẽ ticoaro; bóaneõ ñña-ãrõ; añurõ niirecutiri tiáro. Cũũ teerẽ tiirí, diamacũ maquẽrẽ masí, cãmerí maĩadacu.

<sup>4</sup>Síquẽrã mũũ põnarẽ bũajeá-wũ. Cũãrẽ Cõãmacũ maríre duti-robirora diamacũ niirecutiri ñña-wũ. Teerẽ ññagũ, bayiró useniwũ.

<sup>5</sup>Mecũtígã mũũgẽ ateré bayiró jĩgũda: Marí cãmerí maĩrõ booa. Tee mama dutiré mee niĩã; máatarũra marí padeonũcãrãrẽ dutiré cúũrigue niĩã. <sup>6</sup>Marí cãmerí maĩrã, Cõãmacũ dutirẽre tiirã tiia. Cũũ maríre cãmerí maĩdutí-yigu. Ate múã tũotóarepũ niĩã.

### Jĩĩditorepira maquẽrẽ wederigue

<sup>7</sup>Atibúrecopũre paũ jĩĩditore-pira wáanetõya. Cũã “Jesucristo

basocú marí tiiróbiro õpũũcutigu bauárigũ niiwĩ” jĩĩrẽre padeorí-ya. Cũãno jĩĩditorepira, Cristore ññatutira niĩya. <sup>8</sup>Añurõ tũomasí-ña, Cõãmacũ múãrẽ ticoadarere “tiidióbocu” jĩĩrã, Cõãmacũ niipetire múãrẽ ticoadarere añurõ-mena ñeeãda jĩĩrã.

<sup>9</sup>Cristo buerere cũũ basiro cũũ wãcũrẽmena “nemosãñurõ bue-gũda” jĩĩgũno Cõãmacũrẽ cworí-qui. Cristo buerere tiirucúgũpeja Cõãmacũrẽ, teero biiri cũũ macũrẽ cwoquí. <sup>10</sup>Apetó tiigũ, sícũ múã pũtopũ jeagú Cristo buerere wederiboqui. Cũũnorẽ múãye wiseripũ ñeerijãña. Añudutirijã-ña. <sup>11</sup>Múã cũũrẽ añudutira, cũũ ññañarõ buerere niisotoapeara niĩadacu.

### Wedeyaponorigue

<sup>12</sup>Yũũ pee peti jĩĩdũgare cwo-miã, cwojúpeja. Atipũpũre teerẽ jóaria. Máata marí ññaadacu, Cõãmacũ boorí. Toopũ cãmerí wedeapudacu. Marí teero tiirã, añurõ useniãdacu.

<sup>13</sup>Mũũ bayio põna mũũrẽ añu-dutiya. Coocã Cõãmacũ beserigo niyo.

Nocõrõrã jóaa.

<sup>a</sup>1.1 Ññaña “bũtoá dutirá” glosariopure.